

Formacion Social ta wordo evalua continuamente

Ta traha pa adapta programa pa mantene mas
hoben den SVT



SOCIAAL Vormingstraject (SVT) of Formacion Social cu ta existi for di 2011 a yega hopi lihe na e resultado cu Gabinete Mike Eman I y II a spera di e programa.

E programa Formacion Social

ta un proyecto inicia door di Gobierno lidera pa Prome Minister Eman dunando oportunidad na hobennan di 18 y 24 aña haya un oportunidad di cambio den nan bida, tanto na nivel di

conocemento, educacion y desaroyo personal, social y disciplina.

Prome Minister Mike Eman regularmente ta bishita hobennan den Formacion Social riba puntonan crucial di nan trainingnan, pa asina duna su sosten na e hobennan y particularmente pa nan keda persevera pa nan mesun futuro. Diasabra ultimo, den oranan tempran di mainta, Prome Minister Eman a yega Ricon, den becindario di e area di Grapefield pariba di Aruba pa haci net esaki. Combersando cu e grupo di Formacion Social na Rincon a haci un apelacion na e participantenan pa tene curashi pa sigui den e programa, ya cu hopi biaha e prome simannan ta dificil pa custumbra cu e estructura, disciplina y retonan fisico. "Unabes nan custumbra cu esaki e programa ta bira mas realisabel pa nan."

Aunke cu aworaki e cantidad di participante den e grupo di Formacion 7 ta menos cu e maximo, Jessy Ras, coordinadora general di e programa, a constata caba cu ta trata di un grupo hopi motiva di cual varios di nan a purba den pasado y a dicidi pa bolbe "cu e determinacion pa finalisa e programa y mafian tin un miho futuro". Tur e hobennan participante ta participa den un combersacion cu e comision, pa informa nan kico e programa ta y kico kier

logra na final. Ademá di esaki, ta haci tres test, uno medico, uno fisico y uno di inteligencia, di cual e ultimo aki ta mira con mester adapta e programa educativo.

Ras ta bisa cu e programa a mira varios cambio chikito ora cu nan a mira cu hobennan a cuminsa cay afo, ya cu esaki no tabata e idea. A haci evaluacion pa mira con por adapta e situacion, principalmente den e prome simannan. Pero tambe ta involvi mayornan of un persona cu e hobennan tin confiansa den dje. "Ora cu mira cu un hoben ta demotiva, ta ya e persona pa acudi na kazerne combersa cu e hoben y encurash'e pa keda den e programa," Ras a comenta. Training tabata dificil, el a agrega, y a logra adapta cada grupo na nan capacidad. A bini aserca diferente tipo charla, manera con pa traha cu presupuesto, training social, informacion for di FADA y charla riba aspecto spiritual y motivacion.

Pa Grupo 8 ta pensando riba cambio den e puestonan di stage, ampliando pa sector Horeca, ademá di maintenance y automonteur. Kisas no hiba e hobennan Bivak e prome siman, ya cu esaki ta e parti unda mayoria ta cay afo. "Nos ta wak semper kico mester mehora pa wanta mas hoben den e grupo," Ras a agrega.

OMAR HARMS

Den cada grupo ta haci un evaluacion si mester haci ahuste. Loke a cambia hopi si bou di e gruponan cu tabatin y tin ta e guia individual. Tin un contacto continuo for di inicio cu e participante pa yude finalisa e programa, segun Omar Harms funcionario di Ministerio di Asuntonan General encarga cu SVT. "Prome cu e pensa pa sali, ya caba bo mester sa kico ta pasando cu ne," Sr. Harms a

splica. Den casonan asina ta papia cu e mayornan y si ta necesario ta bay cas papia cu e hoben cu a sali pa mira con por yud'e pa e bolbe y keda te ora e haya su diploma. Si ta na Kazerne tin problema cu e hoben, ta invita e mayornan na Kazerne pa tur hunto combersa. "Cada hoben su situacion ta diferente y mester wordo atendi di forma diferente. Awo por laga nan papia cu un psicologo, trahado social pa convence nan pa keda. Ta hopi facil pa nan entrega, ya cu nan tabata den un situacion unda nan por a haci loke cu nan tabata kier. Den Kazerne e programa ta hopi structura y ta cay dificil pa nan. Den esaki mester ayudo di mayornan, cu no ta tuma nan bek na cas y ta obliga e hoben pa keda den e programa. Esaki ta pasando di grupo 4 bin ariba. Mayornan ta mas involucra den loke nan yiu ta haciendo," Harms a splica.

SARGENTO DIJKHOFF

Sargento Dijkhoff, hoofd instructeur, analisando e gruponan, ta yega na e conclusion cu ta dificil haci un comparacion, mirando cu cada grupo ta diferente. Pero loke el a constata ta cu tin grupo menos fuerte y cu e instructornan ta traha pa hiba nan na e nivel cu kier logra cu e hobennan. Disciplina ta un aspecto cu ta hunga un rol grandi cerca hobennan y por ta motibo pa bandona e grupo. Pero hopi biaha ta papia cu e hobennan y encurasha nan pa sigui te final. Den diferente ceremonia di entrega di baret por a scucha hobennan na final gradiciendo Sargento Dijkhoff cu a duna nan e "push" y apoyo pa sigui den e programa. Dijkhoff a bisa cu te ainda e tin contacto cu varios hoben cu a caba e programa y tin biaha ta yame pa conseho si cos no ta bay bon. "Esaki ta dunabo un gana pa sigui traha cu e hobennan," el a bisa.

